

# S I D E R E V S

N V N C I V S

MAGNA, LONGE QVE ADMIRABILIA

Spectacula pandens, suspiciendaque proponens  
vnicuique, præsertim verò

PHILOSOPHIS, atq; ASTRONOMIS, qua à

## GALILEO GALILEO

### PATRITIO FLORENTINO

Patauini Gymnasij Publico Mathematico

### P E R S P I C I L L I

Nuper a se reperti beneficio sunt obseruata in LVNÆ FACIE, FIXIS IN-  
NUMERIS, LACTEO CIRCULO, STELLIS NEBVLOSI,


Apprime verò in

### Q V A T V O R P L A N E T I S

Circa IOVIS Stellam disparibus interuallis, atque periodis, celeri-  
tate mirabili circumuolutis; quos, nemini in hanc usque  
diem cognitos, nouissimè Author depra-  
hendit primus; atque,

## M E D I C E A S I D E R A

N V N C V P A N D O S D E C R E V I T.



VENETIIS, Apud Thomam Baglionum. M D C X.

Superiorum Permisso, & Privilgio.



# S E R E N I S S I M O

## C O S M O M E D I C E S II.

### M A G N O H A E T R V R I A E

D V C I IIII.



Ræclarum sanè, atque humanitatis plenum eorum fuit institutum, qui excellentium virtute virorum res præclarè gestas ab inuidia tutari, eorumque immortalitate digna nomina ab obliuione, atque interiu- vindicare conati sunt. Hinc ad memoriam posteritatis prodita Imagines, vel marmore insculptæ, vel ex ære factæ; hinc positæ Statuæ tam pedestres, quam equæstres; hinc Columnarum, atque Pyramidum, ut inquit ille, sumptus ad Sydera ducti; hinc denique urbes aedificatae, eorumque insignitæ nominibus, quos grata posteritas æternitati commendandos existimauit. Eiusmodi est enim humanæ mentis conditio, ut nisi assiduis rerum simulacris in eam extrinsecus irruptentibus pulsetur, omnis ex illa recordatio facile effluat.

Verùm alijs firmiora, ac diuturniora spectantes, æternum summorum virorum præconium non saxis, ac me-

A 2 tallis

tallis, sed Musarum custodie, & incorruptis literarum monumentis consecrarentur. At quid ego ista commemoror? quasi vero humana solertia his contenta regionibus, vltierius progrederi non sit ausa; attamen longius illa prōspiciens, cum optimè intelligeret omnia humana monumenta vi, tempestate, ac vetustate tandem interire, incorruptiora Signa excogitauit, in qua Tempus edax, atque iuuidiosa Vetustas nullum sibi ius vindicaret. In Cœlum itaque magnans, clarissimorum Syderum notis, sempiternis illis Orbibus eorum nomina consignauit, qui ob egregia, ac propè diuina facinora digni habitū sunt, qui vna cum Astris aeo sempiterno fruerentur. Quam ob rem non prius Iouis, Martis, Mercurij, Herculis, ceterorumque heroum, quorum nominibus Stellæ appellantur, fama obscurabitur, quam ipsorum Syderum splendor extinguitur. Hoc autem humana sagacitatis inuentum cum primis nobile, ac mirandum multorum iam sacerdorum intervallo exoleuit, priscis heroibus lucidas illas sedes occupantibus, ac suo quasi iure tenentibus: in quorum cœtum frustra pietas Augusti Iulium Cæsarem coapare conata est: nam cum Stellam suo tempore exortam, ex ijs, quas Graci Cometas, nostri Crinitas vocant, Iulum Sydus nuncupari voluisse, breui illa euaneſcens, tanta cupiditatis spem delusit. Atqui longe veriora, ac felicia, Princeps Serenissime, Celsitudini tuae possumus augurari; nam vix dum in terris immortalia animi tui decora fulgere cuperunt, cum in Cœlis lucida Sydera se se offerunt, que tanquam linguae pra-

stan-

3

stantissimas virtutes tuas in omne tempus loquantur, ac celebrent. En igitur quatuor Sydera tuo inclito nomini reseruata, neque illa de gregario, ac minus insigni inerrantium numero, sed ex illustri vagantium ordine, quæ quidem disparibus inter se motibus circum Iouis Stellam ceterarum nobilissimam, tanquam germana eius progenies, cursus suos, orbesque conficiunt celeritate mirabili interea dum vnanimi concordia circa mundi centrum, circa Solem nempe ipsum, omnia simul duodecimo quoque anno magnas conuolutiones absoluunt. Ut autem inclito Celsitudinis tuae nomini præ ceteris novos hosce Planetas destinarem, ipsem et Syderum Opifex perspicuis argumentis me admonere visus est. Etenim quemadmodum he Stella tamquam Ioue digna proles nunquam ab illius latere, nisi exiguo intervallo discedunt; ita quis ignorat clementiam, animi mansuetudinem, morum suavitatem, regij sanguinis splendorem, in actionibus maiestatem, autoritatis, & Imperij in alios amplitudinem, quæ quidem omnia in tua Celsitudine sibi domicilium, ac sedem collocarunt, quis inquam ignorat haec omnia ex benignissimo Iouis Astro, secundum Deum omnium bonorum fontem, emanare? Iuppiter, Iuppiter inquam, à primo Celsitudinis tuae ortus turbidos Horizontis vapores iam transgressus mediumq; celi cardinem occupans, Orientalemque angulum sua Regia illustrans, fælicissimum partum ex sublimi illo trono prospexit, omnemq; splendorem, atq; amplitudinem suam in purissimum aerem profudit, ut uniuersam

illam

illam vim, ac potestatem tenerum corpusculum vna  
cum animo nobilioribus ornamenti iam à Deo decora-  
to, primo spiritu hauriret. Verum quid ego probabi-  
libus vtor argumentationibus, cum id necessaria pro-  
pemodum ratione concludere, ac demonstrare queam?  
Placuit Deo Optimo Maximo, vt à Serenissimis pa-  
rentibus tuis non indignus existimarer, qui Celsitudi-  
ni tue in tradendis Mathematicis disciplinis operam  
nauarem, quod quidem præstigi quatuor superioribus  
annis proximè elapsis, eo anni tempore, quo à seuerio-  
ribus studijs ocium esse consuevit. Quo circa cum mihi  
diuinitus planè contigerit, vt Celsitudini tue inser-  
uirem, atque ideo incredibilis Clementia, ac benigni-  
tatis tuae radios propius exceperim; quid mirum si ani-  
mus meus adeo incaluit, vt nihil aliud propemodum  
dies, noet esque meditetur, quam vt ego, qui non so-  
lum animo, sed etiam ipso ortu, ac natura sub tua  
dominatione sum, tue gloriae cupidissimus, & quam  
gratissimus erga te esse cognoscar? Quæcum ita sint,  
cum te Auspice C O S M E Serenissime, has Stellas  
superioribus Astronomis omnibus incognitas explora-  
uerim, optimo iure eas Augustissimo Pro sapientia tue no-  
mine insignire decreui. Quod si illas primus indaga-  
ui, quis me iure reprehendat, si ijsdem quoque nomen  
imposuero, ac MEDICAE ASTDERA appellaro? sperans fore, vt tantum dignitatis ex hac appella-  
tione ijs Syderibus accedat, quantum alia ceteris  
Heroibus attulerunt. Nam vt taceam de Serenissimis  
tuis Maioribus, quorum gloriam sempiternam om-  
nium

<sup>4</sup>  
niū historiarum monumenta testantur, sola tua vir-  
tus, Maxime Heros, illis Astris impertiri potest no-  
minis immortalitatem. Cui enim dubium esse potest,  
quin quam tui expectationem fælicissimis Imperij Au-  
spicijs concitasti, quamvis summam, eam non solum  
sustineas, ac tuearis, verum etiam longo interuallo  
superaturus sis? vt cum alios tui similes viceris, te-  
cum nihilominus ipse certes, ac te ipso, ac magnitudi-  
ne tua in dies maior euadas.

Suscipe itaque Clementissime Princeps hanc tibi ab  
Astris reseruatam gentilicium gloriam, & illis divinis  
bonis, quæ non tam à Stellis, quam à Stellarum Opi-  
fice, ac Moderatore Deo tibi deferuntur, quam diu-  
tissimè fruere.

Datum Patauij 4. Idus Martij, M DC X.

Celsitudinis tue

Addictissimus Seruū

Galileus Galileus

Gli Eccellenissimi Signori Capi dell'Ecc. Cons. de' X.  
infrascritti, hauvia fede dalli Sig. Reformatori del Studio  
di Padoua per relatione delli due à questo deputati, cioè  
dal Reuer. P. Inquisitor, & dal Circ. Secretario del Senato  
Gio. Marauiglia, con giuramento, come nel libro Intitola-  
to SYD E R E V S N V N C I V S, &c. di D. Ga-  
lileo Galilei non si troua alcuna cosa contraria alla Santa  
Fede Cattolica, Prencipi, & buoni costumi, & che è degno  
di Stampa, concedono licenza, che possi esser stampato in  
questa Città.

Datum Die primo Martij 1610.

D.M.Ant.Valarezzo  
D.Nicolò Bon { Capi dell'Ecc. Cons. de' X.  
D.Lunardo Marcello }

Illustrissimi Consilij X. Secretarius  
Bartholomeus Cominus.

1610. adi 8. Marzo. Regist. in libro à carte 39.

Ioan.Baptista Breatto off.  
Con.Blasph.Coad.



## ASTRONOMICVS N V N C I V S

### O B S E R V A T I O N E S R E C E N S H A B I T A S

Noui Perspicilli beneficio in Lune facie, Laetio circulo  
Stellisq; nebulosis, innumeris fixis, necnon in  
quatuor Planetis

M E D I C E A S Y D E R A  
annupatis, nunquam conspectis adhuc continens,  
atque declarans.



A GNA æquidem in hac exiguâ  
tradatione singulis de Natura  
speculantibus inspicienda, con-  
templandaque propono. Magna,  
inquam, tum ob rei ipsius præ-  
stantiam, tum ob inauditam per  
æuum nouitatem, tum etiam  
propter Organum, cuius bene-  
ficio eadem sensui nostro obuiam fese fecerunt.

Magnum sanè est supra numerosam Inerrantium  
Stellarum multitudinem, quæ naturali facultate in  
hunc usq; diem conspici potuerunt, alias innume-  
ras superaddere, oculisque palam exponere, antehac  
conspectas nunquam, & quæ veteres, ac notas plus-  
quam supra decuplam multiplicitatem superent.

Pulcherrimum, atque visu iocundissimum est, Lu-  
nare corpus per sex denas ferè terrestres diametros <sup>semi</sup>  
à nobis remotum, tam ex propinquo intueri, ac si  
B per

## OBSERVAT. SIDEREAE

per duas tantum easdem dimensiones distaret; adeò ut eiusdem Lunæ diameter vicibus quasi terdenis, superficies verò noningentis, solidum autem corpus vicibus proximè viginti septem millibus maius apparet, quam dum libera tantum acie spectatur: ex quo deinde sensata certitudine quispam intelligat, Lunam superficie leni, & perpolita nequaquam esse indutam, sed aspera, & inaequali; ac veluti ipsiusmet Telluris facies ingentibus tumoribus, profundis lacunis, atque anfractibus vndiquaque confertam existere.

Altercationes insuper de Galaxya, seu de Lacteo circulo substulisse, eiusquè essentiam sensui, nedum intellectui manifestasse, parui momenti existimandum minimè videtur; insuperquè substantiam Stellarū, quas Nebulosas hucusquè Astronomorum quilibet appellavit digito demonstrare, longèque aliam esse quam creditum hactenus est, iocundum erit, atque perpulcrum.

Verum, quod omnem admirationem longè superat, quodvè ad Monitos faciendo cunctos Astronomos, atque Philosophos nos apprimè impulit, illud est, quod scilicet Quatuor Erraticas Stellas nemini eorum, qui ante nos, cognitas, aut obseruatas adiunemus, quæ circa Stellam quandam insignem è numero cognitarum, instar Veneris, atque Mercurij circa Solem, suas habent periodos, eamquè modò præeunt, modò subsequuntur, nunquam extra certos limites ab illa digredientes. Quæ omnia ope Perspicilli à me excogitati diuina prius illuminante gratia, paucis abhinc diebus reperta, atque obseruata fuerunt.

Alia fortè præstantiora, vel à me, vel ab alijs indies adiuenientur consimilis Organi beneficio, cuius formam, & apparatum, necnon illius excogitandi occasionem

## RECENS HABITAE.

6

casionē prius breuiter commemorabo, deinde habitarum à me Observationum historiam recensebo.

**M**ENSIBVS abhinc decē ferè rumor ad aures nostras increpuit, suisse à quodam Belga Perspicillum elaboratum, cuius beneficio obiecta visibilia, licet ab oculo insipientis longè dissita, veluti propinqua distinctè cernebantur; ac huius profecto admirabilis effectus: nonnullæ experientiæ circumferebantur, quibus fidem alij præbebant, negabant alij. Idem paucos post dies mihi per literas à nobili Gallo Iacobo Badouere ex Lutetia confirmatum est, quod tandem in causa fuit, vt ad rationes inquireendas, necnon media excogitanda, per quæ ad consimilis Organi inuentionem deuenire, me totum conuerterem; quam paulopost doctrinæ de Refractionibus innixus assequutus sum; ac tubum primò plumbeum mihi paravi, in cuius extremitatibus vitrea duo Perspicilla, ambo ex altera parte plana, ex altera verò vnum sphæricè conuexum, alterum verò cauum aptauit; oculum deindè ad cauum admouens obiecta satis magna, & propinqua intuitus sum; triplo enim viciniora, nonuplo verò maiora apparebant, quam dum sola naturali acie spectarentur. Alium postmodum exactiorem mihi elaborauit, qui obiecta plusquam sexagties maiora repræsentabat. Tandem labori nullo, nullisquè sumptibus parcens, eò à me deuentum est, vt Organum mihi construxerim adeò excellens, vt res per ipsum visæ millies ferè maiores appareant, ac plusquam in terdecupla ratione viciniores, quam si naturali tantum facultate spectentur. Huius Instrumenti quot, quantaque sint commoda tam in re terrestri, quam in Marittima omnino superiucaneum foret enumerare. Sed missis terrenis, ad Cœlestium speculationes me contuli: ac Lunam prius tam ex propinquo sum in-


B 2 tuitus,

### OBSERVAT. SIDEREAE

tuitus, ac si vix per duas Telluris diametros abesset. Post hanc Stellas tum fixas, tum vagas incredibili animi iocunditate saepius obseruaui; cumquè harum maximam frequentiam viderem, de ratione qua illarum interstitia dimetiri possem excoxitare ceipi, ac demum reperi. Quia de re singulos præmonitos esse decet, qui ad huiuscmodi obseruationes accedere volunt. Primo enim necessarium est, ut sibi Perspicillum parent exactissimum, quod obiecta pellucida, distincta, & nulla caligine obducta repræsentet; eademque ad minus secundum quatercentuplam rationem multiplicet; tunc enim illa bisdecuplo viciniora commonstrabit; nisi enim tale fuerit Instrumentum, ea omnia, quæ à nobis conspecta sunt in celis, quævè infra enumerabuntur, intueri tentabitur frustra. Ut autem de multiplicatione instrumenti quilibet paruo negotio certior reddatur, circulos binos, aut quadrata bina cartacea contornabit, quorum alterum quatercenties altero maius existat, id autem erit tunc, cù maioris diameter, ad diametrum alterius longitudine fuerit vigecupla; deinde superficies ambas in eodem pariete infixas simul à longè spectabit, minorē quidem altero oculo ad Perspicillum admoto, maiorem verò altero oculo libero; commodè enim id fieri licet uno eodemque tempore oculis ambobus adaperitis; tunc enim figuræ ambæ eiusdem apparebunt magnitudinis, si Organum secundum optatam proportionem obiecta multiplicauerit. Consimili parato Instrumento, de ratione distantiarum dimetiendarum inquirendum erit; quod tali artificio assequemur. Sit enim, facilioris intelligentiae gratia, Tubus ABCD. Oculus insipientis esto E. radix, dum nulla in Tubo adessent Perspicilla ad obiectum FG. secundum lineas rectas E. C. F. E D G. ferrentur, sed appositis Perspicillis

### RECENS HABIT AE.

spicillis ferantur secundum lineas refractas E C H. EDI. coarctantur enim, & qui prius liberi ad FG. Obiectum dirigeantur, partem tantummodo HI. cō-



præhendent: accepta deinde ratione distantia EH. ad lineam HI. per tabulam sinuum reperietur quantitas anguli in oculo ex obiecto HI. constituti, quem minuta quædam tantum continere comperiemus. Quod si Specilio CD. brac̄teas, aliás maioribus, aliás verò minoribus perforatas foraminibus aptauerimus, modo hanc modo illam prout opus fuerit superimponentes, angulos alios, atque alios pluribus, paucioribusq; minutis subtendentes pro libito constituemus, quorū ope Stellarum intercapdines per aliquot minuta ad inuicem dissitarum, citra vnius, aut alterius minutū peccatum commodè dimetiri poterimus. Hæc tamē sic leuiter tetigisse, & quasi primoribus libasse labijs in præsentiarum sit fatis, per aliam enim occasiō nem absolutam huius Organi theoriam in medium proferemus. Nunc obseruationes à nobis duobus proximè elapsis mensibus habitas recenseamus, ad magnarū profecto contemplationum exordia omnes veræ Philosophiae cupidos conuocantes.

Dé facie autem Lunæ, quæ ad aspectum nostrum vergit


## OBSERVAT. SIDEREAE

vergit primo loco dicamus, quam facilioris intelligentiae gratia in duas partes distinguo, alteram nempe clariorum, obscuriorum alteram: clarior videtur totum Emisphaerium ambire, atque perfundere; obscurior vero veluti nubes quædam faciem ipsam inficit, maculosamque reddit; istæ autem maculæ suboscuræ, & satis amplæ vnicuique sunt obuiæ, illasque æuum omne conspexit; quapropter magnas, seu antiquas eas appellabimus, ad differentiam aliarum macularum amplitudine minorum, at frequentia ita confitarum, ut totam Lunarem superficiem, præsertim vero lucidorem partem conspergant; haec vero à nemine antenos obseruatæ fuerunt; ex ipsarum autem sèpius iteratis inspectionibus, in eam deduci sumus sententiam, ut certo intelligamus, Lunæ superficiem, non perpolitam, æquabilem, exactissimæque sphæricitatis existere, ut magna Philosophorum coors de ipsa, deque reliquis corporibus cœlestibus opinata est, sed contra inæqualem, asperam, cauitatibus, tumoribusque confertam, non secus, ac ipsiusmet Telluris facies, quæ montium iugis, valliumque profunditatibus hincindè distinguitur. Apparentiæ vero ex quibus haec colligere licuit eiusmodi sunt.

Quarta aut quinta post coniunctionem die, cum splendidis Luna sese nobis cornibus offert, iam terminus, partem obscuram à luminosa diuidens, non æquabiliter secundum oualem lineam extenditur, veluti in solido perfectè sphærico accideret; sed inæquabili, aspera, & admodum sinuosa linea designatur, veluti apposita figura repræsentat: complures enim veluti excrescentiæ lucidæ ultra lucis tenebrarumque confinia in partem obscuram extendentur, & contra tenebricosæ particulæ intra lumen ingrediuntur. Quinimo, & magna nigricantium macularum

## RECENS HABITAE. 8

cularum exiguarum copia, omnino à tenebrosa parte separatarum, totam ferè plagam iam Solis lumine perfusam vndiquaque conspergit, illa saltem excepta parte quæ magnis, & antiquis maculis est affecta. Adnotauimus autem, modo dictas exiguae maculas in hoc semper, & omnes conuenire, ut partem habeant nigricantem locum Solis respicientem; ex aduerso autem Solis lucidioribus terminis, quasi cudentibus iugis corronentur. At consimilem penitus aspectum habemus in Terra circa Solis exortum, dum valles nondum lumine perfusas, montes vero illas ex aduerso Solis. circundantes iam iam splendore fulgentes intuemur: ac veluti terrestrium cavitatum umbræ Sole sublimiora petente immiuuntur, ita & Lunares istæ maculæ, crescente parte luminosa tenebras amittunt.



Verum

## OBSERVAT. SIDEREAE

Verum non modo tenebrarum & luminis confinia in Luna inæqualia , ac sinuosa cernuntur , sed , quod maiorem infert admirationem , permultæ apparent lucidæ cuspides intra tenebrosam Lunæ partem omnino ab illuminata plaga diuisæ , & auulsa , ab ea quæ non per exiguum intercapedinem dissitæ , quæ paulatim aliqua interiecta mora magnitudine , & lumen augmentur ; post verò secundam horam , aut tertiam , reliquæ parti lucidæ , & ampliori iam factæ iunguntur ; interim tamen aliae , atque aliae hincinde quasi pullulantes intra tenebrosam partem accenduntur , augentur , ac demum eidem luminosæ superficie magis adhuc extensæ , copulantur . Huius exemplum eadem figura nobis exibet . At non ne in terris ante Solis exortum , umbra adhuc planities occupante , altissimorum cacumina montium Solaribus radijs illustrantur ? non nè exiguo intericto tempore ampliatur lumen dum mediae , & largiores eorundem montium partes illuminantur ; ac tandem orto iam Sole planicierum , & collum illuminationes iunguntur ? Huiusmodi autem eminentiarum , & cavitatum discrimina in Luna longè latèque terrestrem asperitatem superare videntur , ut infra demonstrabimus . Interim silentio minimè inuolum quid animaduersione dignum à me obseruatum dum Luna ad primam quadraturam properaret , cuius etiam imaginem eadem supra posita delineatio præfert ; ingens enim sinus tenebrosus in partem luminosam subit , versus inferius cornu locatus ; quem quidē sinum cum diutius obseruassem , totumque obscurum vidissem , tandem post duas ferè horas paulò infra medium cavitatis vertex quidam luminosus exurgere cœpit , hic verò paulatim crescens trigonam figuram præseferebat , eratquè omnino adhuc à luminosa facie reuulsus , ac separatus ; mox circa illum tres aliae cuspides exiguae

## RECENS HABITÆ.


9

exiguæ lucere cœperunt ; donec , Luna iam occasum versus tendente , trigona illa figura extensa , & amplior iam facta cum reliqua luminosa parte noctebeatur , ac instar ingentis promontorij , à tribus iam commemoratis lucidis verticibus adhuc obseffa , in tenebrosum finum erumpebat . In extremis quoque cornibus tām superiori , quām inferiori splendida quædam puncta , & omnino à reliquo lumine disiuncta emergebant ; veluti in eadem figura depictum cernitur . Erat quæ magna obscurarum macularum vis in utroque cornu , maximè autem in inferiori ; quarum maiores , & obscuriores apparent , quæ termino lucis , & tenebrarum viciniores sunt ; remotiores verò obscuræ minus , ac magis dilutæ . Semper tamen , ut supra quoque minimums , nigricans ipsius maculæ pars irradiationis Solaris locum respicit , splendidior verò limbus nigrificantem maculam in parte Soli auersa , & Lunæ tenebrosam plagam respiciente , circundat . Hæc Lunaris superficies , quæ maculis , instar Pauonis cauda cœruleis oculis , distinguitur , vitreis illis vasculis redditur consimilis , quæ adhuc calentia in frigidam immissa perfractam , vndosamq; superficiem acquirunt , ex quo à vulgo Glaciales Ciati nuncunpantur . Verum magnæ eiusdem Lunæ maculæ consimili modo interruptæ , atque lacunis , & eminentijs confertæ minimè cernuntur ; sed magis æquabiles , & uniformes ; solummodo enim clarioribus nonnullis areolis hac illac scatent ; adeò ut si quis veterem Pythagoreorum sententiam exuscitare velit , Lunam scilicet esse quasi Tellurem alteram , eius pars lucidior terrenam superficiem , obscurior verò aqueam magis congrue repræsentet : mihi autem dubium fuit nunquam , Terrestris globi à longè conspecti , atque à radijs Solaribus perfusi , terream superficiem clariorem , obscuriorem verò aquam se se in conspe-

C etum

## OBSERVAT. SIDEREAE


Etum daturam. Depressiores insuper in Luna cernuntur magnæ maculæ, quam clariores plagæ; in illa enim tam crescente, quam decrescente semper in lucis tenebrarumque confinio, prominent, hincindè circa ipsas magnas maculas contermini partis lucidioris; veluti in describendis figuris obseruauimus; neque depressiores tantummodo sunt dictarum macularum termini, sed æquabiliores, nec rugis, aut asperitatibus interrupti. Lucidior verò pars maximè propè maculas eminet; adeò vt, & ante quadraturam priuam, & in ipsa fermè secunda circa maculam quandam, superiorem, borealem nempè Lunæ plagam occupantem valde attolluntur tam supra illam, quam infra ingentes quæda eminentiae, veluti appositæ præseferunt delineationes.



Hæc

## RECENS HABITÆ.

76





Hæc eadem macula ante secundam quadraturam nigrioribus quibusdam terminis circumuallata conspicitur; qui tanquam altissima montium iuga ex parte Soli auersa obscuriores apparent, qua verò Solem respiciunt lucidiores extant; cuius oppositum in caitatibus accidit, quarum pars Soli auersa splendens appetet, obscura verò, ac umbrosa, quæ ex parte Solis sita est. Imminuta deinde luminosa superficie, cum primum tota fermè dicta macula tenebris est obducta, clariora motuum dorsa eminenter tenebras scandunt. Hanc duplēcē apparentiam sequentes figuræ com̄mostrant.

C 2 Vnum

RECENS HABITAE. 11

Vnum quoque obliuioni minimè tradam, quod nō nisi aliqua cum admiratione adnotau: medium quasi Lunæ locum à cavitate quadam occupatum esse reliquis omnibus maiori, ac figura perfectæ rotunditatis; hanc tropæ quadraturas ambas conspexi eandemque in secundis illip<sup>re</sup>ris figuris quantum licuit imitatus sum. Eundem quo ad vibrationem, & illuminationem facit aspectum, ac faceret in r<sup>u</sup>rio eo consimilis Boemæ, si montibus altissimis, inque peripheriam perfecti circuli dispositis occluderetur vndique: in Luna enim adeò elatis iugis vallatur, vt extrema hora tenebrosa Luna parti contermina Solis lumine perfusa spectetur, priusquam lucis umbræque terminus ad medianam ipsius figuræ diametrum pertingat. De more autem reliquarum macularum, umbrosa illius pars Solem respicit, luminosa verò versus tenebras Lunæ constituitur; quod tertio libenter observandum admoneo, tanquam firmissimum argumentum, asperitatum, inæqualitatumque per totam Lunæ clariorem plagam dispersarum; quarum quidem macularum semper nigriores sunt illæ, quæ confinio luminis, & tenebrarum conterminæ sunt; remotiores verò tum minores, tum obscuræ minus apparent, ita ut tandem cum Luna in oppositione totum implete orbem, modico, admodumque tenui discrimine, cavitatum opacitas ab eminentiarum candore discrepet.

Hæc quæ recensuimus in clarioribus Lunæ regionibus obseruantur, verum in magnis maculis talis nō conspicitur lacunarum, eminentiarumque differentia, quam necessariò constituere cogimur in parte lucidiori, ob mutationem figurarum ex alia, atque alia illuminatione radiorum Solis, prout multiplici positum Lunam respicit; at in magnis maculis existunt quidem areolæ



## OBSERVAT. SIDEREAE

areolæ nonnullæ subobscurores veluti in figuris adnotauimus, attamen istæ eundem semper faciunt aspectum, neque intenditur earum opacitas, aut remittitur, sed exiguo admodum discrimine paululum obscurores modò apparent, modò verò clariores, si magis, aut minus obliqui in eas radij ~~lunares~~ incident; iunguntur præterea ~~lunares~~ proximis macularum partibus <sup>longi</sup> quædam copula, confinia miscentes, ac confundentes; secus verò in maculis accedit splendidiorē Lunæ superficiem occupantibus; quasi enim abruptæ rupes asperis, & angulatis scopulis consistæ, vmbra, lumenque rudibus discriminib[us] ad lineam distin-  
minantur. Spectantur insuper intra easdem magnas maculas areolæ quædam aliæ clariores, imò nonnullæ lucidissimæ: verùm & harum, & obscuriorum idem semper est aspectus, nulla, aut figurarum, aut lucis, aut opacitatis mutatio; adeò ut compertum, indubitate que sit, apparere illas ob veram partium dissimilitatem, non autem ob inæqualitates tantum in figuris earundem partium, vmbras ex varijs Solis illuminatiōnibus diuersimodè mouentibus; quod bene contingit de maculis alijs minoribus clariorem Lunæ partem occupantibus; indies enim permutantur, augen-  
tur, imminuuntur, abolentur; quippe quæ ab vmbbris tantum eminentiarum ortum ducunt.

Verùm magna hic dubitatione complures affici sentio, adeoque graui difficultate occupari, vt iam explicatam, & tot apparentijs confirmatam conclusionem in dubium reuocare cogantur. Si enim pars illa Lunaris superficie, quæ splendidius Solares radios retorquet, anfictibus, tumoribus scilicet, & lacunis innumeris est repleta; cur in crescenti Luna extrema circumferentia, quæ occasum versus spectat, in decre-  
scenti verò altera semicircumferentia orientalis, ac in plenilu-

## RECENS HABITAE.


12

plenilunio tota periphæria non inæquabilis, aspera, & sinuosa, verùm exactè rotunda, & circinata, nullisque tumoribus, aut cavitatibus corrofa conspicitur? atque ex eo maximè, quia totus integer limbus ex clariori Lunæ substantia constat, quam tuberosam, lacuno-  
samque totam esse diximus; magnarum enim macularum nulla ad extremum usque perimetrum expor-  
gitur, sed omnes procul ab orbita aggregatæ cernuntur. Huius apparentiæ ansam tam grauiter dubitan-  
di præbentis, duplicem causam, ac proinde duplicem dubitationis solutionem in medium affero. Primo e-  
nim; si tufores, & cavitates in corpore Lunari se-  
cundum vnicam tantum circuli periphæriam, emis-  
phærium nobis conspicuum terminantem, protende-  
rentur; tunc posset quidem, imo deberet Luna sub  
specie quasi dentatae rotæ se se nobis ostendere, tu-  
beroso nempe, ac sinuoso ambitu terminata; at si non  
vna tantum eminentiarum series, iuxta vnicam solum-  
modo circumferentiam dispositarum, sed permulti  
montium ordines cum suis lacunis, & anfractibus cir-  
ca extreum Lunæ ambitum coordinati fuerint, ijq;  
non modo in emisphærio apparente, sed in auerso etiā  
(propè tamen emisphæriorum finitorem) tunc oculus  
à longè prospiciens eminentiarum cavitatumque di-  
scrimina depræhendere minimè poterit; intercapedi-  
nes enim montium in eodem circulo, seu in eadem  
serie dispositorum, obiectu aliarum eminentiarum in  
alijs, atque alijs ordinibus constitutarum, occultantur;  
idque maximè, si oculus aspicientis in eadem recta cū  
dictarum eminentiarum verticibus fuerit locatus. Sic  
in terra multorum, ac frequentium montium iuga se-  
cundum planam superficiem disposita apparent, si pro-  
spiciens procul fuerit, & in pari altitudine constitutus.  
Sic estuosi pelagi sublimes vndarum vertices secundum

idem

## OBSERVATIONES SIDEREAE

idem planum videntur extensi, quamvis inter fluctus maxima voraginum, & lacunarum sit frequentia, adeoque profundarum, vt sublimium nauigiorum non modo carinæ, verum etiam puppes, mali, ac vela inter illas abscondantur. Quia igitur in ipsa Luna, & circa eius perimetrum multiplex est eminentiarum, & cauitatum coordinatio, & oculus è longinquò spectans in eodem ferè plano cum verticibus illarum locatur; nemini mirum esse debet quod radio visorio illos abridenti, secundum æquabilem lineam, minimeque anfractuosam se se offerant. Huic rationi altera subnecti potest, quod nempè circa Lunare corpus est, veluti circa Terram, orbis quidam densioris substantiæ reliquo ætere, qui Solis irradiationem concipere, atque reflectere valet, quamvis tanta non sit opacitate præditus, vt visui (præsertim dum illuminatus non fuerit) transitus inibere valeat. Orbis istæ à radijs Solaribus illuminatus, Lunare corpus sub maioris sphære speciem reddit, repræsentatque: essetque potis aciem nostram terminare quominus ad Lunæ soliditatem pertinget, si crassities eius foret profundior; atque profundior quidem est circa Lunæ periphæriam, profundior inquam non absolutè, sed ad radios nostros, oblique illum secantes, relatus; ac proinde visum nostrum inibere potest, ac præsertim luminosus existens, Lunæque peripheriam Soli expositam obtegere. Quod clarius in apposita figura intelligitur, in qua Lunare corpus ABC.



## RECENS HABITAE.

13

ab orbe vaporoso circundatur DEG. Oculus verò ex F. ad partes intermedias Lunæ, vt ad A. pertinet per vapores DA. minus profundos; at versus extremam horam, profundiorum copia vaporum EB. aspectum nostrum suo termino præcludit. Signum huius est, quod pars Lunæ lumine perfusa amplioris circumferentiae appetet, quam reliquum orbis tenebroſi: atque hanc eandem causam quispam forte rationabilem existimabit, cur maiores Lunæ macule nulla ex parte ad extreum usque ambitum protendit confariantur, cum tamen opinabile fit nonnullas etiam circa illum reperiri; inconspicuas tamen esse credibile videtur ex eo, quod sub profundiori, ac lucidiori vaporum copia abscondantur.


Essè igitur clariorem Lunæ superficiem tumoribus, atque lacunis vndiquaque conspersam, ex iam explicatis apparitionibus satis apertum esse reor; superest vt de illorum magnitudinibus dicamus, demonstrantes Terrestres asperitates lunaribus esse longè minores: minores inquam etiam absolutè loquendo, non autem in ratione tantum ad suorum globorum magnitudines; idque sic manifestè declaratur.

Cum saepius à me obseruatum sit in alijs atque alijs Lunæ ad Solem constitutionibus vertices nonnullos intra tenebrosam Lunæ partem, licet à termino lucis satis remotos, lumine perfusos apparere; conserens eorum distantiam ad integrum Lunæ diametrum, cognoui interstitium hoc vigesimam interdum diametri partem superare. Quo sumpto; intelligatur Lunaris globus, cuius maximus círculus CAF. centrum verò E. Dimetiens. CF. qui ad terræ diametrum est vt duo, ad septem; cumque terrestris diameter, secundum exactiores obseruationes milia Italica 7000. contineat, erit CF. 2000. CE.

D. verò

OBSERVAT. SIDEREAE

verò 1000. pars autem vigesima totius. C F. milia-  
ria 100. Sit modo CF. Dimetens circuli maximi.



Iuminosam Lunæ partem ab obscura diuidentis ( ob maximam enim elongationem Solis à Luna hic circulus à maximo sensibiliter non differt ) ac secundum vi- gesimam illius partem distet. A. à puncto. C. & pro- trahatur semidiameter E A. qui extensus occurrat cum contingente G. C. D. ( quæ radium illuminantem re- præsentat ) in punto D. erit igitur arcus C A. seu re- cta CD. 100. qualum C E. est 1000. & aggregatum quadratorum D C. C E. 1010000. cui quadratum D E. æquale est : tota igitur E D. erit plusquam 1004. & A D. plusquam 4. qualum C E. fuit 1000. Sub- limitas igitur A D. in Luna, quæ verticē quempiam ad usque Solis radium G C D. elatū, & à termino C. per distantiam C D. remotū, designat, eminentior est

milia-

RECENS HABITAE.

14

miliaribus Italics 4. verùm in Tellure nulli extant mon- tes, qui vix ad vnius miliarij altitudinem perpendicu- larem accendant ; manifestum igitur relinquitur, Lunares eminentias terrestribus esse sublimiores.

Lubet hoc loco alterius cuiusdam Lunaris appari- tionis admiratione dignæ causam assignare, quæ licet à nobis non recens, sed multis abhinc annis obseruata sit, nonnullisque familiaribus amicis, & discipulis o- stensa, explicata, atque per causam declarata; quia tamen eius obseruatio Perspicilli ope facilior redditur, atque evidentior, non incongruè hoc in loco reponen- dam esse duxi; idque etiam tum maximè, ut cognatio, atque similitudo inter Lunam, atque Tellurem cla- riuss appareat.

Dum Luna tum ante, tum etiam post coniunctionē non procul à Sole reperitur, non modo ipsius globus ex parte qua lucentibus cornibus exornatur visui nostro spectandum se se offert, verum etiam tenuis quædam sublucens periphæria, tenebrose partis, Soli nempè auersæ orbitam delineare, atque ab ipsius ætheris ob- scuriōri campo sciungere videtur. Verum si exactio- ri inspectione rem consideremus, videbimus non tan- tum extreum tenebrose partis limbum incerta quædam claritate lucentem ; sed integrum Lunæ faciem, illam nempè, quæ Solis fulgorem nondum sentit, lu- mine quodam, nec exiguo, albicare; appetat tamen primo intuitu subtilis tantummodo circumferentia lucens, propter obscuriores coeli partes sibi conter- minas; reliqua vero superficies obscuriorè contra vi- detur, ob fulgentium cornuum aciem nostram ob- tenebrantium contactum. Verum, si quis tales sibi eligat situum, ut à tecto, vel camino, aut aliquo alio obice inter visum, & Lunam ( sed procul ab oculo posito ) cornua ipsa lucentia occultentur, pars vero

D 2 reliqua

## OBSERVAT. SIDEREAE

reliqua Lunaris globi aspectui nostro exposita relin-  
quatur, tuncluce non exigua hanc quoque Lunæ pla-  
gam, licet Solari lumine destitutam splendere depræ-  
hendet, idque potissimum, si iam nocturnus orror ob  
folis absentiam increuerit; in campo enim obscurio-  
ri eadem lux clarior appetat. Compertum insuper est,  
hanc secundam (vt ita dicam) Lunæ claritatem ma-  
iorem esse quò ipsa minus à Sole distiterit; per elonga-  
tionem enim ab eo remittitur magis, magisque, adeò  
vt post primam quadraturam, & ante secundam, de-  
bilis, & admodum incerta compariatur, licet in ob-  
scuriōri cœlo spectetur; cum tamen in sextili, &  
minorī elongatione, quamvis inter crepuscula mirum  
immodum fulgeat: fulgeat inquam adeò, vt ope ex-  
acti Persicilli magnæ maculæ in ipsa distinguantur. Hic  
mirabilis fulgor non modicam philosophantibus intu-  
lit admirationem; pro cuius causa afferenda alij alia  
in medium protulerunt. Quidam enim proprium esse,  
ac naturalem ipsiusmet Lunæ splendorem dixerunt;  
alij à Venere illi esse impertitum, alij à Stellis omni-  
bus, alij à Sole; qui radijs suis profundam Lunæ soli-  
ditatem permeet. Verūm huiuscemodi prolata exi-  
guo labore coarguuntur, ac falsitatis euincuntur. Si  
enim aut proprium esset, aut à Stellis collatum eius-  
modi lumen, illud maximè in Eclypsibus retineret, o-  
stenderetque, cum in obscurissimo cœlo destituatur;  
quòd tamen aduersatur experientia: fulgor enim qui  
in deliquijs appetat in Luna longè minor est, subru-  
fus, ac quasi aeneus; hic verò clarior, & candidior; est  
insuper ille mutabilis, ac loco mobilis; vagatur enim  
per Lunæ faciem, adeò vt pars illa, quæ peripheriæ  
circuli vmbrae terrestris propinquior est, clarior, re-  
liqua verò obscurior semper spectetur; ex quo omni  
proculdubio id accidere intelligimus, ex radiorum So-  
larium

## RECENS HABITAE.

15

Iarium vicinitate tangentium crassiorem quandam regio-  
nem, quæ Lunam orbiculariter ambit, ex quo cōtactu Au-  
rora quædam in uicinas Lunæ plagas effunditur, nō secus  
ac in terris tum mane, tum vesperi crepusculinum spargi-  
tur lumen; qua de re fusius in libro de Sistematice mundi  
pertractabimus. Afferere autem à Venere impertitum eius  
modi lucem puerile adeò est, vt responsione sit indignum;  
quis enim adeò inscius erit, vt non intelligat, circa coniun-  
ctionem, & intra sextilem aspectū, partem Lunæ, Soli auer-  
sam vt à Venere spectetur omnia esse impossibile? Esse au-  
tem ex Sole, qui suo lumine profundam Lunę soliditatem  
penetret, atque perfundat, pariter est inopinabile; nunquā  
enim imminueretur, cum semper emisphærium Lunæ à So-  
le sit illustratum, tempore Lunarium Eclypsium excepto:  
diminuitur tamen dum Luna ad quadraturam properat, &  
omnino ē hebetatur, dum quadratum superauerit. Cum  
itaque eiusmodi secundarius fulgor, nec Lunæ sit congeni-  
tus, atque proprius, nec à Stellis vllis, nec à Sole mutuatus,  
cumq; iam in Mundi vaſtitate corpus aliud supersit nullū,  
nisi sola Tellus; quid quæſo opinandum? quid proferen-  
dum? nunquid à Terra ipsum Lunare corpus, aut quidpiā  
aliud opacum, atque tenebrosum lumine perfundi? quid  
mirum ē maximè: æqua grataque permutatione rependit  
Tellus parem illuminationem ipsi Lunæ, qualem & ipsa à  
Luna in profundioribus noctis tenebris toto ferè tempo-  
re recipit. Rem clarius aperiamus. Luna in coniunctio-  
nibus, cum medium inter Solem & Terram obtinet locū,  
Solaribus radijs in superiori suo emisphærio Terre auerso  
perfunditur; emisphærium verò inferius, quo Terram  
aspicit tenebris est obductum; nullatenus igitur terrestre  
superficie illustrat. Luna paulatim à Sole digressa iam  
iam aliqua ex parte in emisphærio inferiori ad nos ver-  
gente illuminatur, albantia cornua, subtilia tamen ad  
nos conuertit; & leuiter Terram illustrat: crescit in Luna

D 3 iam

PAT. OBSERVAT. SIDERE AE

iam ad quadraturam accidente Solaris illuminatio; augetur in terris eius luminis reflexio; extenditur adhuc supra semicirculum splendor in Luna; & nostræ clariores effulgent noctes; tandem integer Lunæ vultus, quo terram aspicit, ab opposito Sole clarissimis fulgoribus irradiat; emitet longè lateque terrestris superficies Lunæ splendore perfusa; postmodum decrescens Luna debiles ad nos radios emittit, debilius illuminatur terra; Luna ad coniunctionem properat, atra nox Terram occupat. Tali itaque periodo alternis vicibus Lunaris fulgor menstruas illuminationes clariores modo, debiliores alias nobis largitur: verum æqua lance beneficium à Tellure compensatur. Dum enim Luna sub Sole circa coniunctiones reperitur, superficiem terrestris emispherij Soli expositi, viuidisque radijs illustrati integrum respicit, reflexumque ab ipsa lumen concipit: ac proinde ex tali reflexione inferius emisphærium Lunæ, licet Solari lumine destitutum, non modicè lucens appetet. Eadem Luna per quadrantem à Sole remota, dimidium tantum terrestris emispherij illuminatum conspicit, scilicet occiduum, altera enim medietas orientalis nocte obtenebratur: ergo & ipsa Luna splendidè minus à Terra illustratur, eiusvè proinde lux illa secundaria exilior nobis appetet. Quod si Lunam in oppositione ad Solem constitutas: spectabit ipsa emisphærium intermediae Telluris omnino tenebrosum, obscuraque nocte perfusum; si igitur ecliptica fuerit talis oppositio, nullam prorsus illuminationem recipiet Luna, Solari simul, ac terrestri irradiatione destituta. In alijs, atque alijs ad Terram, & ad Solem habitudinibus maius, minusvè à terrestri reflexione recipit lumen, prout maiorem, aut minorem terrestris emispherij illuminati partem spectauerit; is enim inter duos hosce Globos seruatur tenor, ut quibus temporibus maximè à Luna illustratur Tellus, ijsdem mi-

nus

RECENS HABITAE.

16

nus vice versa à Terra illuminetur Luna, & è contra. Atque hæc pauca de hac re in presenti loco dicta sufficiant, fusius enim in nostro Systemate Mundi, ubi complurimis & rationibus, & experimentis validissima Solaris luminis è Terra reflexio ostenditur illis, qui eam à Stellarum corea arcendam esse iactant, ex eo potissimum, quod à motu, & à lumine fit vacua: vagam enim illam, ac Lunam splendore superantem, non autem sordium, mundanarumque fecum sentinam, esse demonstrabimus, & naturalibus quoque rationibus sexcentis confirmabimus.

Diximus hucusque de Observationibus circa Lunare corpus habitis, nunc de Stellis fixis ea quæ actenus à nobis inspecta fuerunt breuiter in medium adferamus. Ac primo illud animaduersione dignum est, quod scilicet Stellæ tam fixæ, quam errabundæ, dum adhibito Perspicillo spectantur, nequaquam magnitudine augeri videntur iuxta proportionem eandem, secundum quam obiecta reliqua, & ipsamet quoque Luna, acquirunt incrementa: verum in Stellis talis auctio longè minor appetet: adeo vt Perspicillum, quod reliqua obiecta secundum centuplam, gratia exempli rationem multiplicare potens erit, vix secundum quaduplam, aut quintuplam Stellas multiplies reddere credas: ratio autem huius est, quod scilicet Astra dum libera, ac naturali oculorum acie spectantur, non secundum suam simplicem, nudamque, vt ita dicam, magnitudinem se se nobis offerunt, sed fulgoribus quibusdam irradiata, micantibusque radijs crinita, idque potissimum, cum iam increuerit nox; ex quo longè maiores videntur, quam si ascitijs illis crinibus esent exuta: angulus enim visorius non à primario Stellæ corpusculo, sed à latè circumfuso splendore terminatur. Hoc apertissime intelligas licet ex eo,

## OBSERVAT. SIDER EAE

eo, quod Stellæ in Solis occasu inter prima crepuscula emergentes, tametsi primæ fuerint magnitudinis, exiguae admodum apparent; & Venus ipsa si quando circa meridiem se nobis in conspectum dederit, adeo exilis cernitur, vt vix Stellulam magnitudinis ultimæ æquare videatur. Secus in alijs obiectis, & in ipsam Luna contingit, quæ siue in meridiana luce, siue inter profundiores tenebras spectetur, eiusdem semper molis appareat. intonſa igitur in medijs tenebris spectantur Astra, crines tamen illorum diurna lux abradere potest; at non lux ista tantum, sed tenuis quoque nubecula, quæ inter Sydus, & oculum aspicientis interponatur; idem quoque præstant nigra velamina, ac vitra colorata, quorum obiectu, atque interpositione circumfusi fulgores Stellas deserunt. Hoc idein pariter efficit Perspicillum, prius enim adscititios, accidentalesque à Stellis fulgores adimit, illarum inde globulos simplices (si tamen figura fuerint globoſa) auget, atque adeo secundum minorem multiplicitatem adauera videntur: Stellula enim quintæ, aut sextæ magnitudinis per Perspicillum visa, tanquam magnitudinis prime repreſentatur.

Adnotatione quoque dignum videtur esse discri men inter Planetarum, atque fixarum Stellarum aspectus: Planetæ enim globulos suos exactè rotundos, ac circinatos obijciunt, ac veluti Lunulae quædam vndeique lumine perfusa, orbiculares apparent: Fixæ vero Stellæ peripheria circulari nequaquam terminatæ cōspiciuntur, sed veluti fulgores quidam radios circumcirca vibrantes; atque admodum scintillantes: consimilatandem figura præditæ apparent cum Perspicillo, ac dum naturali intuitu spectantur, sed adeo maiores, vt Stellula quintæ, aut sextæ magnitudinis Canem, maximam nempè fixarum omnium æquere videatur.

Verum

## RECENS HABITAE.

Verūm infra Stellas magnitudinis sextæ, adeo numerosum gregem aliarum, naturalem intuitum fugientium, per Perspicillum intueberis, vt vix credibile fit, plures enim quam sex aliae magnitudinum differentiæ videoas licet. quarū maiores, quas magnitudinis septimæ, seu primæ inuisibilium appellare possumus, Perspicilli beneficio maiores, & clariores apparent, quam magnitudinis secundæ Sydera acie naturali visa. Ut autem de inopinabili ferè illarum frequen tia vnam, alteramvè attestationem videoas Asterismos duos subscribere placuit, vt ab eorum exemplo de cæteris iudicium feras. In primo integrum Orionis Constellationem pingere decreueram; verūm ab ingenti Stellarum copia, temporis verò inopia obrutus, aggressionem hanc in aliā occasionem distuli; adstant enim, & circa veteres intra vi nius, aut alterius gradus limites disseminantur plures quin gentis: quapropter tribus quæ in Cingulo, & senis quæ in Ense iampridem adnotatae fuerunt, alias adiacentes octuaginta recens visas apposuimus; earumq; interstitia quo exactius licuit seruauimus: notas, seu veteres, distinctionis gratia, maiores pinxit, ac dupli linea contornauimus, alias inconspicuas, minores, ac vnis lineis notaui mus; magnitudinum quoque discrimina quo magis licuit seruauimus. In altero exemplo sex Stellas Tauri, PLEIADAS dicas depinximus (dico autem sex, quandoquidem septima ferè nunquam appareat) intra angustissimos in cœlo cancellos obclufas, quibus aliae plures quam quadraginta inuisibilis adiacent; quarum nulla ab aliqua ex prædictis sex vix ultra semigradum elongatur; harum nos tantum trigintasex adnotauimus; earumque interstitia, magnitudines, necnon veterum nouarumque discrimina veluti in Orione seruauimus.

Cinguli, & Ensis ORIONIS Asterismus.

PLEIA.



## PLEIADVM CONSTELLATIO.



...ou tertio loco à nobis fuit obseruatum, est ipsius net LACTEI Circuli essentia, seu materies, quam Perspicilli beneficio adeò ad sensum licet intueri, vt & altercationes omnes, quæ per tot sæcula Philosophos excrucia runt ab oculata certitudine dirimantur, nosque à verbosis disputationibus liberemur. Est enim GALAXYA nihil aliud, quam innumerarum Stellarum coaceruatim confitarum congeries; in quamcunq; enim regionem illius Perspicillum dirigas, statim Stellarum ingens frequentia se se in conspectum profert, quarum complures satis magnæ, ac valde conspicuæ videntur; sed exiguarum multitudine prorsus inexplorabilis est.

At cum non tantum in GALAXYA lacteus ille candor, veluti albicantis nubis spectetur, sed complures consimilis coloris areolæ sparsim per æthera subfulgeant, si in illarum quamlibet Specillum conuertas Stellarum constipatarum

cetum

## OBSERVAT. SIDEREAE

cœtum offendes. Amplius (quod magis miraberis) Stellæ ab Astronomis singulis in hanc vsque diē NEBVLOSAE appellatæ, Stellarum mirum immodum confitarum gressunt; ex quarum radiorum commixtione, dum vna queque ob exilitatem, seu maximam à nobis remotionem, oculorum aciem fugit, candor ille consurgit, qui densior pars cœli, Stellarum, aut Solis radios retorquere valens, hucusque creditus est. Nos ex illis nonnullas obseruauimus; & duarum Asterismos subnectere voluimus.

In primo habes NEBVLOSAM Capitis Orionis appellatam, in qua Stellas vigintivnas numerauimus.

Secundus NEBVLOSAM PRAESEPE nuncupatam continet, quæ non vna tantū Stella est, sed congeries Stellarum plurium quam quadraginta: nos præter Aſellos trintatex notauiimus in hunc, qui sequitur ordinem dispositas.

## NEBVLOSA PRAESEPE.

### NEBVLOSA ORIONIS.



## RECENS HABITÆ.

17

De Luna, de inerrantibus Stellis, ac de Galaxya, quæ hactenus obſeruata sunt breuiter enarrauimus. Superest vt, quod maximum in præſenti negotio exiſtimandum videtur, quatuor PLANETAS à primo mundi exordio ad nostra vsque tempora nunquam conſpectos, occaſionem reperiendi, atque obſeruandi, nec non ipsorum loca, atque per duos proximè menses obſeruationes circa eorundem latitudes, ac mutationes habitas, aperiamus, ac promulgemus: astronomos omnes conuocantes, vt ad illorum periodos inquireandas, atq; definiendas se conferant, quod nobis in hanc vsque diem ob temporis angustiam afsequi minime licuit. Illos tamen iterum monitos facimus, ne ad talem inspectionem incassum accedant, Perspicillo exactissimo opus esse, & quale in principio sermonis huius, descripsimus.

Die itaque septima Ianuarij instantis anni millesimi sexcentesimi decimi, hora ſequentis noctis prima, cum celeſtia sydera per Perspicillum ſpectare, Iupiter ſe ſe obuiam fecit, cumque admodum excellens mihi parafem instrumentum, (quod antea ob alterius Organi debilitatem minime contigerat) tres illi adſtare ſtellulas, exigua quidem, veruntamen clarissimas, cognoui; quæ licet è numero inerrantium à me crederentur, non nullam tamen intulerunt admirationem, eo quod ſecundum exactam lineam rectam, atque Eclipticæ pararellam dispositæ videbantur: ac ceteris magnitudine paribus splendidiiores: eratque illarum inter ſe & ad iouem talis constitutio.

Ori. \* \* O \* Occ.

E ex parte,

## OBSERVATIONES SIDEREAE

ex parte scilicet Orientali duæ aderant Stellæ, vna verò Occasum versus. Orientalior atque Occidentalis, reliqua paulo maiores apparabant, de distantia inter ipsas. & Iouem minime sollicitus fui; fixæ enim ut diximus primo creditæ fuerunt; cum autem die octaua, nescio quo Fato ductus, ad inspectionem eandem reuersus essem, longè aliam cōstitutionem reperi; erant enim tres Stellulæ occidentales omnes à Ioue, atque inter se quam superiori nocte viciniores, paribusque interstitijs mutuo disperatae, veluti apposita præfert delineatio. Hic licet ad mutuam Stellarum appropinquationem minimè cogitationem appulisse,

Ori.



\* \* \*

Occ.

*hęc exitare tamen cępī, quonam pacto Iuppiter ab omnibus prædictis fixis posset orientalior reperiri, cum à binis ex illis pridie occidentalis fuisset: ac proinde veritus sum ne forte, secus à computo astronomico, directus foret, ac propterea motu proprio Stellas illas anteuertisset: quapropter maximo cum desiderio sequentem expectavi noctem; verum à spe frustratus fui, nubibus enim vndiquaque obductum fuit celum.*

At die decima apparuerunt Stellæ in eiusmodi ad Iouem positi: duæ enim tantum, & orientales ambæ.

Ori.

\*



Occ.

aderant, tertia, vt opinatus fui, sub Ioue latitante. Erant pariter veluti antea in eadem recta cum Ioue, ac iuxta Zodiaci longitudinem adamussim locatae. Hæc cum vidissim, cumque mutationes consimiles in Ioue nulla.

## RECENS HABITAE.

18

nulla ratione reponi posse intelligerem, atque insuper spectatas Stellas semper eisdem fuisse cognoscere, ( nullæ enim aliæ, aut præcedentes, aut consequentes intra magnum interuallum iuxta longitudinem Zodiaci aderant) iam ambiguatatem in admirationem permutans, apparentem commutationem non in Ioue, sed in Stellis adnotatis repositā esse comperi; ac proinde oculatè, & scrupulosè magis deinceps obseruan- dum fore sum ratus.

Die itaq; undecima eiuscemodi constitutionem vid̄;

Ori.

\* \*



Occ.

Stellas scilicet tantum duas orientales; quarum media triplo distabat à Ioue, quam ab orientaliori: eratque orientalior duplo ferè maior reliqua, cum tamen antecedenti nocte æquales fermè apparuissent. Statutum ideo, omnique procul dubio à me decretum fuit, tres in coelis adesse Stellas vagantes circa Iouem, instar Veneris, atque Mercurij circa Solem: quod tandem luce meridiana clarius in alijs postmodum compluribus inspectionibus obseruatū est; ac non tantum tres, verum quatuor esse vaga Sydera circa Iouem suas circumvolutiones obeuntia; quorum permutationes exactius consequenter obseruatas subsequens narratio ministrabit; interstitia quoque inter ipsa per Perspicillum, superius explicata ratione, dimetitus sum: ho- ras insuper obseruationum, præfertim cum plures in eadem nocte habitæ fuerunt apposui; adeo enim celestes horum Planetarum extant revolutiones, vt horarias quoque differentias plerunque liceat accipere.

Die igitur duodecima, hora sequentis noctis prima hac ratione disposita Sydera vidi. Erat orientalior

E 2 Stella

## OBSERVAT. SIDEREAE

Ori.

\* \* ○ \*

Occ.

Stella occidentaliori maior, ambæ tamen valdè conspicuæ, ac splendidæ: vtra quæ distabat à Ioue scrupulis primis duobus; tertia quoque Stellula apparere cœpit hora tertia prius minimè conspecta, quæ ex parte orientali Iouem ferè tangebat, eratque admodum exigua. Omnes fuerunt in eadem recta, & secundum Eclipticæ longitudinem coordinatæ.

Die decimatercia primum à me quatuor conspectæ fuerunt Stellulæ in hac ad Iouem constitutione. Erant tres occidentales, & una orientalis; lineam proximè

Ori.

\* ○ \*\* \*

Occ:

rectam constituebant; media enim occidetalium paullum à recta Septentrionem versus deflectebat. Aberrat orientalior à Ioue minuta duo: reliquarum, & Iouis intercapedes erant singulæ vnius tantum minutæ. Stellæ omnes eandem præ se ferebant magnitudinem; ac licet exiguum, lucidissimæ tamen erant, ac fixis eiusdem magnitudinis longe splendidiores.

Die decimaquarta nubilosa fuit tempestas.

Die decimaquinta, hora noctis tertia in proximè depicta fuerunt habitudine quatuor Stellæ ad Iouem;

Ori.

○ \* \* \*

Occ.

occidentales omnes: ac in eadem proxim recta linea dispositæ; quæ enim tertia à Ioue numerabatur paullum

## RECENS HABITAE.

19

Iulum in boream attollebatur; propinquior Ioui erat omnium minima, reliquæ consequenter maiores apparebant; interualla inter Iouem, & tria consequantia Sydera erant æqualia omnia, ac duorum minutorum: at occidentalius aberat à sibi propinquo minutis quatuor. Erant lucida valde, & nihil scintillantia, qualia semper tum ante, tum post apparuerunt. Verum hora septima tres solummodo aderant Stellæ, in huius-

Ori.

○

\* \* \*

Occ.

cemodi cum Ioue aspectu. Erant nempe in eadem recta ad vnguem, vicinior Ioui, erat admodum exigua, & ab illo semota per minuta prima tria; ab hac secunda distabat min: vno; tertia verò à secunda min: pr: 4. sec: 30. Post verò aliam horam duæ Stellulæ mediæ adhuc viciniores erant; aberant enim min: sc: vix 30. tantum.

Die decimæxæta hora prima noctis tres vidimus Stellas iuxta hunc ordinem dispositas. Duæ Iouem

Ori.

○

\* \*

Occ.

intercipiebant ab eo per min: o. sec: 40. hincinde remotæ, tertia verò occidentalis à Ioue distabat min: 8. Ioui proximæ non maiores, sed lucidiores apparebant remotiori.

Die decimæseptima hora ab occasu o. min: 30. huiusmodi fuit configuratio. Stella una tantum orientalis à

Ori.

○

\* \*

Occ.

Ioue

### OBSERVAT. SIDEREAE

Ioue distabat min: 3. occidentalis pariter vna à Ioue distans min: 11. Orientalis duplo maior apparebat occidentali; nec plures aderant quam istæ duæ. Verum post horas quatuor, hora nempe proximè quinta, tercia ex parte orientali emergere cepit, quæ antea, ut opinor cum priori iuncta erat, fuitque talis positio.

Ori. \* ○ \* Occ.

Media Stella orientali quam proxima min: tantum sec: 20. elongabatur ab illa, & à linea recta per extremas, & Iouem producta paululum versus austrū declinabat.

Die decima octava hora o. min: 20. ab occasu, talis fuit aspectus. Erat Stella orientalis maior occiden-

Ori. \* ○ \* Occ.

li, & à Ioue distans min: pr: 8. Occidentalis vero à Ioue aberat min: 10.

Die decimanona hora noctis secunda talis fuit Stellarum coordinatio: erant nempe secundum rectam li-

Ori. \* ○ \* \* Occ.

neam ad vnguem tres cum Ioue Stellaræ: Orientalis vna à Ioue distans min: pr: 6. Inter Iouem, & primam sequentem occidentalem, mediabat min: 5. interstitiū: hæc autem ab occidentaliori aberat min: 4. Anceps eram tunc nunquid inter orientalem Stellam, & Iouem Stellula mediaret, verum Ioui quamproxima, adeo ut illum ferè tangeret; At hora quinta hanc manifeste vi-

di

### RECENS HABITAE.

20

di medium iam inter Iouem, & orientalem Stellam locum exquisitè occupantem, ita vt talis fuerit confi-

Ori. \* \* ○ \* \* Occ.

guratio. Stella insuper nouissimè conspecta admodum exigua fuit; veruntamen hora sexta reliquis magnitudine ferè fuit æqualis.

Die vigesima hora 1. min: 15. constitutio consimilis visa est. Aderant tres Stellaræ adeo exiguae, vt vix

Ori. \* ○ \* \* Occ.

percipi possent; à Ioue, & inter se non magis distabant minuto uno: incertus eram nunquid ex occidente duæ, an tres adessent Stellaræ. Circa horam sextam hoc pacto erant dispositæ. Orientalis enim à Ioue

Ori. \* ○ \* \* Occ.

duplo magis aberat quam antea, nempe min: 2. media occidentalis à Ioue distabat min: o. sec: 40. ab occidentaliori vero min: o. sec: 20. Tandem hora septima tres ex occidente visæ fuerunt Stellaræ. Ioui proxima abe-

Ori. \* ○ \* \* Occ.

rat ab eo min: o. sec: 20. inter hanc & occidentaliorē interuallū erat minutorum secundorum 40. inter has vero alia spectabatur paululum ad meridiem deflectēs; ab

### OBSERVAT. SIDEREAE

ab occidentaliori non pluribus decem secundis remota.  
Die vigesima prima hora o. m: 30. aderant ex oriente  
Stellulæ tres, æqualiter inter se, & à Ioue dixtantes;

Ori.

\* \* \* ○ \*

Occ.

interstitia vero, secundum existimationem 50. secundorum minutorum fuere, aderat quoque Stella ex occidente à Ioue distans min: pr: 4. Orientalis Ioui proxima erat omnium minima, reliquæ vero aliquato maiores, atque inter se proximè æquales.

Die vigesima secunda hora 2. consimilis fuit Stellarum dispositio. A Stella orientali ad Iouem minuto-

Ori.

\* ○ \* \* \*

Occ.

rum primorum 5. fuit interuallum à Ioue ad occidentalem pr: 7. Duæ verò occidentales intermediæ dixabant ad inuicem min: o. sec: 40. propinquior verò Ioui aberat ab illo m. p. 1. Ipsæ mediae Stellulæ, minores erant extremis: fuerunt verò secundum eandem rectam lineam iuxta Zodiaci longitudinem extensæ, nisi quod trium occidentalium media paululum in austrum deflecebat. Sed hora noctis sexta in hac constitutio-

Ori.

\* ○ \* \* \*

Occ.

ne visæ sunt. Orientalis admodum exigua erat; distans à Ioue ut antea min: pr. 5. Tres verò occidentales, & à Ioue, & ad inuicem æqualiter dirimebantur, erantque intercedentes singulæ min: 1. sec: 20. proximè

### RECENS HABITAE.

21

mè: & Stella Ioui vicinior reliquis duabus sequentibus minor apparebat; omnesque in eadem recta exquisite dixpositæ videbantur.

Die vigesima tertia hora o. min: 40 ab occasu, in huc fermè modum Stellarum constitutio se habuit: erant

Ori.

\* \* ○ \*

Occ.

tres Stellæ cum Ioue in recta linea secundum Zodiaci longitudinem; veluti semper fuerunt: Orientales erant duæ, vna verò occidentalis. Orientalior aberat à sequenti min: pr: 7. hæc verò à Ioue min. 2. sec: 40. Iuppiter ab occidentali min: 3. sec: 20. erantque omnes magnitudine ferè æquales. Sed hora quinta, duæ Stellæ, quæ prius Ioui erant proximæ amplius non cernebantur, sub Ioue ut arbitror latitantes fuitque talis aspectus.

Ori.

\* ○

Occ.

Die vigesimaquarta tres Stellæ orientales omnes visæ sunt, ac ferè in eadem cum Ioue recta linea; me-

Ori.

\* \* ○

Occ.

dia enim modicè in austrum deflectebat. Ioui propinquior distabat ab eo min: 2. sequens ab hac min: o. sec: 30. ab hac verò aberat orientalior min: 9. erantque omnes admodum splendidæ. Hora verò sexta, duæ

Ori.

\* \* ○

Occ.

F solum-

## OBSERVATIONES SIDEREAE

solummodo sese offerebant Stellæ in hoc positu: nempe cum Ioue in eadem recta linea ad vnguem, à quo elongabatur propinquior min: p: 3. altera vero ab hac min: p: 8. in vnam, ni fallor, coierant duæ mediae prius obseruatae Stellulae.

Die vigesima quinta hora 1. min: 40. ita se habebat

Ori. \* \* ○ Occ.

constitutio, aderant enim duæ tantum Stellæ ex orientali plaga, eaque fatis magna. Orientalior à media distabat min: 5. media verò à Ioue min: 6.

Die vigesima sexta hora 0. min: 40. Stellarum coordinatio eiusmodi fuit. Spectabantur enim Stellæ

Ori. \* \* ○ \* Occ.

tres, quarum duæ orientales, tertia occidentalis à Ioue: hæc ab eo min: 5. aberat, media verò orientalis ab eodem distabat min: 5. sec: 20. Orientalior verò à media min: 6. in eadem recta constitutæ, & eiusdem magnitudinis erant. Hora deinde quinta constitutio ferè eadem fuit, in hoc tantum discrepans, quod

Ori. \* \* \* ○ \* Occ.

prope Iouem quarta Stellula ex oriente, emergebat cæteris minor à Ioue tunc remota min: 30. sed paululum à recta linea versus Boream attollebatur, ut aposta figura demonstrat.

Die vigesima septima hora t. ab occasu, vnica tan-

## RECENS HABITAE.

32

tum Stellula conspiciebatur, eaque orientalis secun-

Ori.



Occ.

dum hanc constitutionem: eratque admodum exigua, & à Ioue remota min: 7.

Die vigesima octava, & vigesima nona ob nubium interpositionem nihil obseruare licuit.

Die trigesima hora prima noctis, tali pacto constituta spectabantur sydera: vnum aderat orientale, à Ioue

Ori. \* ○ \* \* Occ.

distans min: 2. sec: 30. duo verò ex occidente, quorum Ioui propinquius aberat ab eo min: 3. reliquum ab hoc min: 1. extremorum & Iouis positus in eadem recta linea fuit, at media Stella paululum in Boream attollebatur: Occidentalior fuit reliquis minor.

Die ultima hora secunda visæ sunt orientales Stellæ duæ, una verò occidua. Orientalium media à Ioue

Ori. \*\* ○ \* Occ.

aberat min: 2. sec: 20. Orientalior verò ab ipsa media min: 0. sec: 30. Occidentalis distabat à Ioue min: 10. erant in eadem recta linea proximè, orientalis tantum Ioui vicinior modicum quiddam in Septentrionem elevabatur. Hora verò quarta duæ orientales vicinio-

Ori. \*\* ○ \* Occ.

F 2 res

### OBSERVAT. SIDEREAE

res ad inuicem adhuc erant; aberant enim solummodo min: sec. 20. apparuit in hisce obseruationibus occidentalis Stella satis exigua.

Die Februarij prima hora noctis secunda consimilis fuit constitutio. Distabat orientalior Stella à Ioue

Ori. \* ○ \* Occ.

min: 6. occidentalis verò 8. ex parte orientali Stella quædam admodum exigua à Ioue distabat minutis secundis 20. rectam ad vnguem designabant lineam.

Die secunda iuxta hunc ordinem visæ sunt Stellæ. Una tantum orientalis à Ioue distabat min: 6. Iuppi-

Ori. \* ○ \* \* Occ.

ter ab occidentali viciniori aberat min: 4. inter hanc & occidentaliores min: 8. fuit intercapedo; erant in eadem recta ad vnguem, & eiusdem ferè magnitudinis. Sed hora septima, quatuor aderant Stellæ, inter

Ori. \* \* ○ \* \* Occ.

quas Iuppiter medium occupabat sedem. Harum Stellarum orientalior distabat à sequenti min: 4. hæc à Ioue min: 1. sec: 40. Iuppiter ab occidentali sibi viciniori aberat min: 6. hæc verò ab occidentaliori min: 8. erantque pariter omnes in eadem recta linea, secundū Zodiaci longitudinem extensa.

Die tertia hora septima in hac serie dispositæ fuerunt Stellæ. Orientalis à Ioue distabat min: 1. sec: 30. Occidentalis

### RECENS HABITAE.<sup>10</sup> 23

dentalis proxima min: 2. ab hac vero elongabatur oc-

Ori. \* ○ \* \* Occ.

cidentalior altera min: 10. erant præcisè in eadem recta, & magnitudinis æqualis.

Die quarta hora secunda circa Iouem quatuor stabant Stellæ, orientales duæ, ac duæ occidentales in

Ori. \* \* ○ \* \* Occ.

eadem ad vnguem recta linea dispositæ, vt in proxima figura. Orientalior distabat à sequenti min: 3. hæc verò à Ioue aberat min: 0. sec: 40. Iuppiter à proxima occidentali min: 4. hæc ab occidentaliori min: 6. magnitudine erant ferè æquales, proximior Ioui reliquis paulo minor apparebat. Hora autem septima orientales Stellæ distabant tantum min: 0. sec: 30. Iuppiter

Ori. \*\* ○ \* \* Occ.

ab orientali viciniori aberat min: 2. ab occidentali verò sequente min: 4. hæc verò ab occidentaliori distabat min: 3. erantque æquales omnes, & in eadem recta secundum Eclypticam extensa.

Die quinta Cœlum fuit nubilosum.

Die sexta duæ solummodo apparuerunt Stellæ me-

Ori. \* ○ \* Occ.

dium

### OBSERVAT. SIDEREAE

dium Iouem intercipientes, vt in figura apposita spe-  
ctatur: orientalis à Ioue distabat min. 2. occidentalis  
verò min. 3. erant in eadem recta cum Ioue, & magni-  
tudine pares.

Die septima duæ adstabant Stellæ, à Ioue orienta-

Ori.                    \* \* ○                    Occ.

les ambæ, in hunc dispositæ modum. intercedentes  
inter ipsas, & Iouem erant æquales vnius nempe mi-  
nuti primi; ac per ipsas, & centrum Iouis recta linea  
incedebat.

Die octava hora prima aderant tres Stellæ orienta-

Ori.                    \* \*                    \* ○                    Occ.

les omnes vt in descriptione; Ioui proxima exigua  
satis distabat ab eo min. 1. sec. 20. media vero ab hac  
min. 4. erantque satis magna; orientalior admodum exi-  
guia ab hac distabat min. 0. sec. 20. anceps eram nun-  
quid Ioui proxima vna tantum, an duæ forent Stellu-  
læ: videbatur enim interdum huic aliam adesse versus  
ortum mirum inmodum exigua, & ab illa seiuuncta  
per min. 0. sec. 10. tantum: fuerunt omnes in eadem  
recta linea secundum Zodiaci ductum extensa. Ho-  
ra verò tertia Stella Ioui proxima illum ferè tangebat,  
distabat enim ab eo min. 0. sec. 10. tantum reliquæ ve-  
rò à Ioue remotiores factæ fuerunt: aberant enim me-  
dia à Ioue min. 6. Tandem hora quarta, quæ prius  
Ioui proxima erat, cum eo iuncta non cernebatur am-  
plius.

Die nona hora o. min: 30. adstabant Ioui Stellæ duæ  
orien-

### RECENS HABITAE. 24

orientales, & vna occidentalis in tali dispositione. O:

Ori.                    \*                    \* ○                    \*                    Occ.

orientalior, quæ satis exigua erat à sequenti distabat  
min: 4. media maior à Ioue aberat min: 7. Iuppiter ab  
occidentali, quæ parua erat distabat min. 4.

Die decima hora prima min: 30. Stellulæ binæ admo-  
dum exiguae orientales ambæ in tali dispositione visæ

Ori.                    \*                    \* ○                    \*                    Occ:

funt: remotior distabat à Ioue min: 10. vicinior verò  
min: 0. sec. 20. erantque in eadem recta. Hora autem  
quarta, Stella Ioui proxima amplius non apparebat,  
altera quoque adeo imminuta videbatur, vt vix cerni  
posset, licet aer præclarus esset, & à Ioue remotior,  
quam antea erat, distabat, siquidem min: 12.

Die undecima hora prima aderant ab Oriente Stel-  
læ duæ, & vna ab occasu. Distabat occidentalis à

Ori.                    \*                    \* ○                    \*                    Occ.

Ioue min. 4. Orientalis vicinior aberat pariter à Ioue  
min. 4. Orientalior vero ab hac distabat min. 8. erant  
satis perspicuae, & in eadem recta. Sed hora tertia

Ori.                    \*                    \* ○                    \*                    Occ.

Stella quarta Ioui proxima ab oriente visa est, reliquis  
minor

### OBSERVAT. SIDEREAE

minor, à Ioue diffusa per min. o. sec. 30. & à recta linea per reliquas Stellas protracta modicum in Aquilonem deflectens, splendidissimæ erant omnes, ac valde conspicuæ. Hora verò quinta cum dimidia iam Stella orientalis Ioui proxima, ab illo remotior facta mediū inter ipsum, & Stellam orientaliorem sibi propinquam obtinebat locum, erantque omnes in eadem recta linea ad vnguem, & eiusdem magnitudinis, ut in apposita descriptione videre licet.

Ori. \*      \* \* ○      \*      Occ.

Die duodecima hora o. min. 40. Stellæ binæ ab ortu binæ pariter ab occasu distabant. Orientalis remotior

Ori. \*      \*○\*      \*      Occ.

à Ioue distabat min. 10. longinquier verò Occidentalis aberat min. 8. erantque ambæ satis conspicuæ, reliquæ duæ Ioui erant vicinissimæ, & admodum exiguae, præsertim Orientalis, quæ à Ioue distabat min. o. sec. 40. Occidentalis vero min. 1. Hora verò quarta Stellula quæ Ioui erat proxima ex oriente amplius non apparebat.

Die decimatercia hora o. min. 30. duæ Stellæ apparabant ab ortu, duæ insuper ab occasu. Orientalis ac Ioui

Ori. \*      \* ○      \* \*      Occ.

vicinior satis perspicua distabat ab eo min. 2. ab hac orientalior minus apparet ab min. 4. Ex occidentaliori-

### RECENS HABITAE.

25

dentalibus remotior à Ioue conspicua valde ab eodimebatur min. 4. inter hanc & Iouem intercedebat Stellula exigua, ac occidentaliori Stellæ vicinior, cum ab ea non magis abessest min. o. sec. 30. erant omnes in eadem recta secundum Eclipticæ longitudinem ad vnguem.

Die decimaquinta (nam decimaquarta coelum nubibus fuit obductum) hora prima talis fuit astrorum positus. tres nempe erant orientales Stellæ, nullave-

Ori.      \*      \*\* ○      Occ.

rò cernebatur occidentalis: Orientalis Ioui proxima distabat ab eo min. o. sec. 50. sequens ab hac aberat min. o. sec. 20. ab hac verò orientalior min. 2. erantque reliquis maior: viciniores enim Ioui erant admodum exiguae. Sed hora proximè quinta, ex Stel.

Ori.      \*      \*○\*      Occ.

lis Ioui proximis vna tantum cernebatur à Ioue distans min. o. sec. 30. Orientalis verò elongatio à Ioue adaucta erat, fuit enim tunc min. 4. At hora sexta præter duas, ut modo dictum est ab oriente

Ori.      \*      \*○\*      Occ.

constitutas, vna versus occasum cernebatur Stellula admodum exigua, à Ioue remota min. 2.

Die decimasexta hora sexta in tali constitutione steterunt. Stella nempe orientalis à Ioue min. 7. aberat

G

### OBSERVAT. SIDEREAE

Berat: Iuppiter à sequenti occidua min. 5. hæc verò à reliqua occidentaliori min. 3. erant omnes eius-

Ori. \* ○ \* \* Occ.

dem proximè magnitudinis, satis conspicuæ, & in eadem recta linea exquisitè secundum Zodiaci ductum.

Die decimaseptima H. 1. duæ aderant Stellæ, orientalis vna à Ioue distans min. 3, occidentalis altera distas-

Ori. \* ○ \* . Occ.

min. 10. hæc erat aliquanto minor orientali. Sed hora 6. orientalis proximior erat Ioui distabat nempe mi. 6. sec. 50. occidentalis verò remotior fuit, scilicet min. 12. Fuerunt in utraque obseruatione in eadem recta, & ambæ satis exiguae, præsertim orientalis in secunda obseruatione.

Die 18. Ho. 1. tres aderant Stellæ, quarum duæ occidentales, orientalis verò vna: distabat orientalis à Ioue

Ori. \* ○ \* \* Occ.

min. 3. Occidentalis proxima m. 2. occidentalior reliqua aberat à media m. 8. Omnes fuerunt in eadem recta ad vnguem, & eiusdem ferè magnitudinis. At Hora 2. Stellæ viciniores paribus à Ioue aberant interstitijs: occidua enim aberat ipsa quoque m. 3. Sed Hora 6. quarta Stellula visa est inter orientalorem & Iouem in tali configuratione. Orientalior distabat à sequenti m. 3. sequens à Ioue.

### RECENS HABITAE. 26

Ioue m. 1. sec. 50. Iuppiter ab occidentalibus sequentim. 3.

Ori. \* \* ○ \* \* Occ.

hæc verò ab occidentaliori m. 7 erat ferè æquales, orientalis tantum Ioui proxima reliquis erat paulo minor. erantque in eadem recta Eclipticæ parallela.

Die 19. Ho. 0. m. 40. Stellæ duæ solammodo occiduae à Ioue conspectæ fuerunt satis magnæ, & in eadem re-

Ori. ○ \* \* Occ.

cta cum Ioue ad vnguem, ac secundum Eclipticæ ductu dispositæ. Propinquior à Ioue distabat m. 7. hæc verò ab occidentaliori m. 6.

Die 20. Nubilosum fuit coelum.

Die 21. Ho. 1. m. 30. Stellulæ tres satis exiguae cernebantur in hac constitutione. Orientalis aberat à Ioue

Ori. \* ○ \* \* Occ.

m. 2. Iuppiter ab occidentalibus sequente. m. 3. hæc verò ab occidentaliori m. 7. erant ad vnguem in eadem recta Eclipticæ parallela.

Die 25. Ho. 1. m. 30. (nam superioribus tribus noctibus coelum fuit nubibus obductum) tres apparuerunt Stellæ.

Ori. \* \* ○ \* Occ.

Orientales duæ, quarum distantiæ inter se, & à Ioue  
G 2 æquales

OBSERVAT. SIDEREAE  
æquales fuerunt, ac min. 4. Occidentalis vna aberat à Ioue min. 2. Erant in eadem recta ad vnguem, secundum Eclypticæ ductum.

Die 26. Hora o. m. 30. binæ tantum aderant Stellæ. Orientalis vna distans à Ioue m. 10. Occidentalis altera

Ori. \* ○ \* Occ.

distans m. 6. Orientalis erat aliquanto minor occidentali. Sed Hora 5. tres visæ sunt Stellæ, præter enim duas iā

Ori. \* ○ \* Occ.

adnotatas tertia ex occidente propè Iouem admodum exigua cernebatur, quæ prius sub Ioue latitabat, distabatque ab eo m. 1. Orientalis verò remotior, quam ante videbatur, distans nempè à Ioue m. 11. Hac nocte pri-  
mum Iouis & adiacentium Planetarum progressum se-  
cundum Zodiaci longitudinem facta relatione ad fixam quandam obseruare placuit: spectabatur enim fixa Stel-  
la orientem versus distans à Planeta orientali m. 11. &  
paululum in Austrum deflectebat, in hunc qui sequitur modum.

Ori. \* ○ \* \*

\* fixa

Die 27. Ho. 1. m. 4. Apparebant Stellæ in tali configura-  
tione. Orientalior distabat à Ioue min. 10. sequens Ioui proxima min. 0. sec. 30. Occidentalis sequens aberat  
min. 2.

RECENS HABITAE. 27

min. 2. sec. 30. ab hac occidentalior distabat min. 1. Vici-

Ori. \* ○ \* \* Occ.

\* fixa

niores Ioui exiguae apparebant, præfertim Orientalis, extremæ verò erant admodum conspicuae in primis verò occidua, rectamque lineam secundum Eclypticæ du-  
ctum designabant ad vnguem. Horum Planetarum pro-  
gressus versus ortum ex collatione ad prædictam fixam manifestè cernebatur, ipsi enim Iuppiter cum adstantib.  
Planetis vicinior erat, vt in apposita figura videre licet.  
Sed Ho. 5. Stella orientalis Ioui proxima aberat ab eo  
min. 1.

Die 28. Ho. 1. duæ tantum Stellæ videbantur; orien-  
talis distans à Ioue min. 9. Occidentalis verò m. 2. Erant

Ori. \* ○ \* \* Occ.

\* fixa

satis conspicuae, & in eadem recta: ad quam lineam fixa perpendiculariter incidebat in Planetam orientalē, ve-  
luti in figura. Sed hora 5. tertia Stellula ex oriente di-

Ori. \* ○ \* \* Occ.

stans à Ioue m. 2. conspecta est in eiusmodi cōstitutione.

Die 1. Martij Ho. o. m. 40. quatuor Stellæ orientales  
omnes

OBSERVAT. SIDEREAE

omnes conspectæ sunt, quarum Ioui proxima aberat ab eo m.2. sequens ab hac m.1. tertia m.o. sec.20. eratque

Ori.

\* \* \*



Occ.

\* fixa

reliquis clarior; ab ista verò distabat orientalior m.4. & reliquis erat minor. Rectam proximè designabant linea, nisi quod tertia à Ioue paululum attollebatur. Fixa cum Ioue, & orientaliori trigonum æquilaterum constituebat ut in figura.

Die 2. Ho.o.m.40. tres adstabant Planetæ, orientales duo, vñus verò occiduus in tali configuratione. Aberat

Ori.

\* \*



Occ.

\* fixa

orientalior à Ioue m.7 ab hoc distabat seques m.o.s.30. Occidentalis verò elongabatur à Ioue m.2. erant extre- mi lucidiores, ac maiores reliquo, qui admodum exiguis apparebat. Orientalior à recta linea per reliquos & Ioue ducta paululum in Boream videbatur elatus. Fixa iam adnotata ab occidentali Planeta m.8. distabat, secundum perpendiculararem ab ipso Planeta ductam super lineam rectam per Planetas omnes extensam; veluti apposita figura demonstrat.

Hasce Iouis, & adiacentium Planetarum ad Fixa col- latio-

RECENS HABITAE.

28

Iationes apponere placuit, vt ex illis eorundem Planetarum progressus, tum secundum longitudinem, tum etiam secundum latitudinem, cum motibus, qui ex tabulis auriuntur ad unguem congrueret quilibet intelligere possit.

Hæ sunt observationes quatuor Mediceorum Planetarum recens, ac primò à me repertorum, ex quibus quāvis illorum periodos numeris colligere nondū detur; licet saltem quædam animaduersione digna pronunciare. Ac primo cum Iouem consimilibus interstitijs modo consequantur, modo præant, ab eoq; tum versus ortum, tum in occasum angustissimis tanq; diuariationibus elongentur, eundemq; retrogradum pariter, atq; directum concomitetur, quin circa illum suas conficiant conueriones, interea dum circa mundi centrum omnes vñā duo deceniales periodos absoluunt, nemini dubiū esse potest. Conuertuntur insuper in circulis inæqualibus, q; manifestè colligitur ex eo, quia in maioribus à Ioue digressionibus nūquā binos Planetas iunctos videre licuit; cum tamen propè Iouem duo, tres, & interdum oēs simul constipati reperti sint. Deprehenditur insuper velociores esse conueriones Planetarū angustiores circa Iouem circulos describentiū; propinquiores enim Ioui Stellæ sæpius spectantur orientales, cum pridie ex occasu apparuerint, & è contra: at Planeta maximū permeās orbem, accuratè præadnotatas reuersiones perpendenti, restitutions semimenstruas habere videtur. Eximium præterea præclarumq; habemus argumentū pro scrupulo ab illici demendo, qui in Sistematico Copernicano conuerione Planetarum circa Solē æquo animo ferentes, adeò perturbantur ab vnius Lunæ circa terrā latione, intereadū ambo annū orbē circa Solē absoluunt, vt hanc vniuersi cōstitutionē tanq; impossibilem euertendā esse arbitrentur; nunc enim nedum Planetā vñū circa aliū conuertibile habemus, dū ambo magnū circa Solē perlustrant orbem; verum quatuor circa Iouē instar Lunæ circa Tellurē, sensus nobis va-

gantes

## OBSERVAT. SIDERÆAE

gantes offert Stellas, dum oës simul cū Ioue 12. annorum  
spacio magnū circa Solē permeant orbē. Prætereundū tan-  
dem non est, qua nā rōne contingat, vt Medicea Sidera dū  
angustissimas circa louē rotationes absoluunt, semetipsis  
interdum plusq; duplo maiora videantur. Causam in vapo-  
ribus terrenis minimè q̄rere possumus: apparent enim au-  
cta, seu minuta, dū Iouis, & propinquarū fixarū moles nil  
immutata cernuntur. Accedere aut illos, adeoq; à terra e-  
longari circa suæ cōuersione perigeū, aut apogeū; vt tantæ  
mutationis cām nanciscantur, oīnō inopinabile vī; nā arcta  
circularis latio id nulla rōne p̄f̄stare valet; oualis verò mo-  
tus (qui in hoc casu rectus ferè effet) & inopinabilis, & ijs q̄  
apparent nulla rōne consonus esse vī. Quod hac in re suc-  
currit lubens profero, ac rectè philosophantiū iudicio, cē-  
furæq; exhibeo. Cōstat terrestriū vaporū obiectu Solē, Lu-  
namq; maiores, sed fixas, atq; Planetas minores apparere:  
hinc Luminaria propè orizontē maiora, Stellæ vero mino-  
res, ac plerunq; inconspicuæ imminuuntur et magis si ijde  
vapores lumine fuerint perfusi; idcirco Stellæ iuterdiu, ac  
intra crepuscula admodum exiles apparent; Luna non itē,  
vt supra quoq; monuimus. Constat insuper nō modo Tel-  
lurem, sed et Lunam suum habere vaporosum orbē circū-  
fusum, tum ex his quæ supra diximus, tum maximè ex ijs,  
quæ fusius in nostro Sistemate dicentur; at idē quoq; de re  
liquis Planetis ferre iudiciū congrue possumus; adeò vt et  
circa Iouem densiorem reliquo æthere ponere orbem in-  
opinabile minime videatur, circa quem, instar Lunæ circa  
elementorum spheram, Planetæ MEDICEI circumducantur,  
atque huius orbis obiectu dum apogei fuerint mino-  
res, dum verò perigei, per eiusdem orbis ablationem, seu at-  
tenuationem maiores appareant. Utteriuspro-  
gredi temporis angustia inhibet; plura  
de his breuī candidus Lector  
expectet.

F I N I S.

